

Na osnovu član 148. Poslovnika Gradskog vijeća Grada Sarajeva („Službene novine Kantona Sarajevo“, br. 28/09, 11/20 i 19/20) Komisija za Statut i akte Gradskog vijeća Grada Sarajeva upućuje inicijativu Gradskom vijeću Grada Sarajeva da podnese Kantonu Sarajevo sljedeću

INICIJATIVU

ZA PROMJENU USTAVA KANTONA SARAJEVO

(radni materijal)

Na osnovu člana 88. Statuta Grada Sarajeva („Službene novine Kantona Sarajevo“, broj 34/08-Prečišćeni tekst), a u vezi sa članom 53. Zakona o principima lokalne samouprave („Službene novine Federacije BiH“, br. 49/06 i 51/09) Gradsko vijeće Grada Sarajeva upućuje **inicijativu** zastupnicima u Skupštini Kantona Sarajevo, klubovima zastupnika u Skupštini Kantona Sarajevo i Vladi Kantona Sarajevo, da podnesu Skupštini Kantona Sarajevo, a Skupštini Kantona Sarajevo da usvoji, amandman na Ustav Kantona Sarajevo kojim će se omogućiti direktan izbor gradonačelnika Grada Sarajeva i istovremeno prilaže radni materijal za mogući tekst amandmana sa obrazloženjem kako slijedi.

Na osnovu člana V.2.6.a) Ustava Federacije Bosne i Hercegovine i člana 42. Ustava Kantona Sarajevo („Službene novine Kantona Sarajevo“, br. 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana .2022. godine, usvaja

AMANDMAN LVIII

NA USTAV KANTONA SARAJEVO

U članu 4c. Ustava Kantona Sarajevo, koji je dodat Amandmanom LII na Ustav Kantona Sarajevo, u stavu 2. tačka 2. mijenja se i glasi:

„2. uređuje izbor gradonačelnika i zamjenika gradonačelnika tako da se gradonačelnik bira demokratskim putem, na neposrednim i tajnim izborima na cijelom području Grada Sarajeva, na način utvrđen zakonom.“

OBRAZLOŽENJE

I - USTAVNI OSNOV

Ustavni osnov za donošenje ovog amandmana sadržan je u odredbi člana V.2.6a). Ustava Federacije Bosne i Hercegovine, gdje je propisano da zakonodavno tijelo kantona dvotrećinskom većinom donosi kantonalni ustav kao i članom 42. Ustava Kantona Sarajevo gdje je propisan način izmjene Ustava Kantona Sarajevo.

II – RAZLOZI ZA DONOŠENJE

Razlozi za donošenje ovog amandmana sastoje se u potrebi da se omogući Gradu Sarajevu da svojim Statutom uredi izbor gradonačelnika demokratskim putem, na neposrednim i tajnim izborima na cijelom području Grada Sarajeva, u skladu sa zakonom, na način kako se biraju gradonačelnici i drugih gradova u Federaciji BiH, te da u skladu s tim, svojim statutom uredi izbor zamjenika gradonačelnika.

III - OBRAZLOŽENJE PRAVNIH RJEŠENJA

Predloženim amandmanom, u članu 4c. Ustava Kantona Sarajevo kojim se uređuju nadležnosti Gradskog vijeća Grada Sarajeva, mijenja se odredba kojom je uređeno da Gradsko vijeće „ bira gradonačelnika i zamjenike gradonačelnika, u skladu sa zakonom,“ tako da se umjesto nadležnosti Gradskog vijeća da bira gradonačelnika, Gradskom vijeću Grada Sarajeva daje nadležnost da svojim Statutom uredi izbor gradonačelnika na neposrednim izborima kao i da uredi izbor zamjenika gradonačelnika na odgovarajući način.

IV – FINANSIJSKA SREDSTVA

Za donošenje amandman koji se predlaže nisu potrebna posebna finansijska sredstva.

OBRAZLOŽENJE INICIJATIVE

Statutom Grada Sarajeva u članu 88, propisano je:

„U vršenju vlasti i ostvarivanja prava i dužnosti građana, Kantonalne vlasti i organi Grada Sarajeva djeluju zajednički na partnerskim osnovama, izuzev u oblasti administrativnog nadzora koji veže Federalne i Kantonalne vlasti u pogledu rada organa Grada Sarajeva.

Grad Sarajevo može Federalnim, odnosno Kantonalnim vlastima na razmatranje upućivati inicijative, prijedloge i sugestije.“

Zakonom o principima lokalne samouprave u Federaciji BiH, u članu 53. propisano je

„Federalne, odnosno kantonalne vlasti dužne su razmotriti inicijative, prijedloge i sugestije jedinica lokalne samouprave i o svom stavu i poduzetim aktivnostima obavijestiti jedinice lokalne samouprave u roku od 30 dana od dana prijema inicijative, prijedloga ili sugestije.“

Gradsko vijeće Grada Sarajeva je u procesu izmjene Statuta Grada Sarajeva. Jedan od osnovnih razloga za pristupanje izmjeni Statuta Grad Sarajeva je usklađivanje sa posljednjim izmjenama Ustava Kantona Sarajevo. Opredjeljenje organa Grada Sarajeva je da se uredi izbor gradonačelnika tako da na demokratskim izborima svaki građanin ima pravo direktno glasati za gradonačelnika kako je to i u dugim gradovima u F BiH, a u skladu sa zakonom.

Međutim, uređivanje ovakvog izbora u Statutu Grada Sarajeva nije moguće, budući da je Ustavom Kantona Sarajevo, izbor gradonačelnika propisan kao nadležnost Gradskog vijeća.

S tim u vezi, podnosi se inicijativa i predlaže subjektima nadležnim za podnošenje amandmana na Ustav Kantona Sarajevo da podnesu amandman kojim će se Ustav Kantona izmijeniti tako da se omogući građanima Grada Sarajeva neposredan izbor gradonačelnika. Istovremeno Gradsko vijeće Grada Sarajeva upućuje inicijativu Skupštini Kantona Sarajevo da ta takav amandman i usvoji.